

海陽縣志卷三十四

列傳三

蘇軾

趙鼎

楊萬里

吳潛

陸秀夫

已上宋

朱天麟

明

王命岳

葉方恆

徐乾學

魏際瑞

吳震方

沈涵

趙執信

潘耒

張尚瑗

蔡世遠

海陽縣志

卷三十四

列傳三

一

孟亮揆

邱京

劉璇

劉紹虞

史瑗

潘靖

金虞廷

黃釗

已上

國朝

寓賢

宋

蘇軾字子瞻眉州人宋元祐中謫惠州自惠州來潮訪韓山居六

日歸舟次蓬萊游陰那有過陰那山詩並序

據周志修

趙鼎字元鎮解州聞喜人崇甯進士紹興中賢相也為秦檜所害

安置潮州居五年杜門謝客時事不挂口有問者但引咎而已尋

移吉陽軍

同上

楊萬里號誠齋吉水人紹興進士由贛州司戶參軍知漳州調廣東提舉督師至潮經彭田鋪登韓山復觀於海有句云平生不慣乘肥馬老去須教遇瘦牛蓋過瘦牛嶺作也餘游歷亦多題詠

據周

志張志
參修

吳潛字毅夫甯國人登進士第一開慶初拜左丞相賈似道軍漢陽以潛移之黃州爲欲殺已銜之嗾御史沈炎劾潛措置無方會

上欲立忠王禛爲太子密奏忤旨遂落職謫潮州尋徙循州

據周志修

陸秀夫字君實鹽城人其父徙家鎮江景定登進士李庭芝鎮淮南辟至幕下三遷至主管機宜文字咸淳十年庭芝制置淮東擢參議官德祐元年邊事急諸僚屬多亡者惟秀夫數人不去累擢

海陽縣志

卷三十四

列傳三

一一

宗正少卿兼權起居舍人二年正月以禮部侍郎使軍前請和不就而返與蘇劉義追從二王於温州召陳宜中張世傑等皆至遂相與立端宗於福州進端明殿學士簽書樞密院事與宜中議不合宜中使言者劾罷之謫潮州攜家寓潮之闕望港口世傑讓宜中曰此何時動以臺諫論人耶宜中恐亟召還時君臣播越海濱每朝會秀夫儼然正笏立如治朝或時在行中淒然泣下以朝衣拭淚衣盡溼屬井澳颶風端宗以驚疾崩羣臣皆欲散去秀夫曰古人有以一旅一成中興者今度宗皇帝一子尚在百官有司皆具士卒數萬天若未欲絕宋此豈不可爲國耶又相與立帝弟昺嗣位年八歲矣時宜中往占城屢召不至乃以秀夫爲左丞相與

世傑共秉政世傑駐兵厓山秀夫外籌軍旅內調工役凡有述作盡出其手雖恩遽流離中猶日書大學章句以勸講祥興二年二月厓山破秀夫走御舟先仗劍驅妻子入海卽負帝赴海死年四十四

同上

明

朱天麟崑山人明進士官閣部初游潮主太僕寺卿梁罔卿應龍說其子國棟許字以女未委禽值鼎革南北途梗歷十餘年梁已娶李氏女天麟卒於滇夫人沈氏扶櫬還吳繞道送女入潮就婚蓋奉天麟遺言也人咸服其高義云

據張志修

國朝

海陽縣志

卷三十四

列傳三

二

王命岳字伯咨閩之晉江人崇禎間領鄉薦常往來潮城每寓數月方去順治乙未登進士選庶常轉兵科抗疏言事不避忌諱引古援今精練痛切海內傳誦焉奉使至廣東餽遺一無所受轉刑科左給事以議獄忤旨降級卒於京師

同上

葉方恆字學窩江南崑山人父重華官嶺東道方恆與弟方藹隨侍居潮二年延海陽明經劉振龍爲師方恆後成進士官方面方藹順治己亥進士以第三人及第歷官侍讀學士至禮部侍郎使問不絕人以爲難

同上

徐乾學字原一江南崑山人康熙庚戌進士賜進士第三人爲孝廉時訪舊至潮與程鄉令洪圖光友善寄懷贈答楮墨淋漓其潮

州襍興云蠻女科頭足踏塵丈夫徧裏越羅巾無分晴雨穿高屐
豈是風流學晉人餘若韓山陰那等山皆有題詠字亦精工潮人
寶之所著有澹園集

同上

魏際瑞原名祥字伯善江西甯都人魏兆鳳長子康熙甲寅逆鎮
劉進忠踞潮城以叛 朝命劉伯祿爲潮州總兵官聘際瑞置幕
府兆鳳曰吾老矣不欲汝行然救災卹患此其時也汝或不方便
人不救殺戮卽非吾子矣時平南王尚可喜遣子將軍尚之信統
兵討賊因潮城久不下將令屠城祥極言於劉帥帥跣足頓首以
去就爭之劉遼東廣甯人

據周志修

吳震方字青壇石門人少居粵康熙庚辰客潮著有嶺南雜記二

海陽縣志

卷三十四

列傳三

四

卷中多紀潮州事有謁韓文公廟詩云幼讀文公文神怪詫驅鱷
稍壯知愛詩惟公乃願學文筆固起衰詩篇尤卓犖刮摩去翳盲
心盲口開鑿運思入微茫滉蕩不可捉高撞萬里濤清聞九天鶴
漢魏存古風齊梁卑齷齪譌體競流濫元音漸渺邈芸鋤出蕪穢
開闢見荒度元和詩格精孟張共犄角不然宋元製蚤已恣輕薄
公生孔孟後斯道獨先覺天不生文公日中成晦魄堯舜傳精一
非口就與托原道原性篇終唐無此作自公明絕統程朱照高躅
其功在萬世名與鄒魯若當時惑佛老朽骨勢薰灼一表批龍鱗
朝奏夕貶削萬里來潮陽瘴癘不敢虐先生得趙子鄉校興禮樂
若潮有璠璣惟公剖之璞若潮有梓材惟公勤斲樸遂令海濱士

絃誦并京洛廟貌千載餘俎豆馨笙籥我來尋鯉溪遺蹟儼如昨
公門久私淑再拜契冥漠荔丹與蕉黃椒漿跪傾酌有唐第一人
題字實無忤翱翔丹霄鳳豈類笑鵬鸞誰歟擠公者消滅隨燐燭
茲公以山名特立參喬嶽喬嶽有時泐此山終不剝

據嶺南雜記修

涵字度汪號心齋浙江歸安人康熙丙辰進士歷官內閣學士
早歲遊學至潮郡守張克嶷偕士大夫師事之嘗教人曰從來造
物忌名名太盛則多挫折然處此亦無他法去怠去驕後督學閩

中一時奇士多出其門閩中稱學使第一

據周志修

趙執信字伸符號秋谷山東益都人康熙己未進士官左春坊左
贊善以觀劇非時被劾落職遂浪迹江湖與聞喜張克嶷拗齋善

海陽縣志

卷三十四

列傳三

五

克嶷守潮州念秋谷不置每大醉輒呼其字繼之以哭已而趙至
張喜甚聯榻清談往往宵分不寐秋谷雅善書潮州昌黎廟碑東
坡真蹟久亡後人摹刻者亦毀張要趙書而勒諸石趙有詩紀其

事

同上

潘耒字次耕號稼堂江南吳江人康熙十八年試博學鴻詞授翰
林院檢討崑山顧炎武徐乾學其師也徐沒耒周卹其孫復刻炎
武日知錄及詩文集平生精敏敢言無稍遜避同館忌之遂落職
澤州相國陳廷敬欲薦起耒耒曰止止吾分也賦老馬行以謝耒
遊嶺表至潮著有潮州雜詩手書一冊以贈邑人陳珏其閉礦行
云潮郡綿萬山客程傍山行路逢採樵者略訊諸山名指點最深

處云中有銀坑盜採昔無禁贏糧走疲氓尋苗劓巖腹排沙出精
英鎔冶爛成餅朱提遜光晶貧兒可暴富利原啟紛爭攘奪或相
殺盜賊滋縱橫小利乃大害官長豈不明處脂有餘潤欲禁焉得
成賢哉今太守謂張清廉莫與京始至啖以利峻拒如堅城決策
遣封閉塞爭銷姦萌居民始安堵桴鼓寂不鳴我聞重太息斯人
信邦楨遠宦在天末雅操能冰清或言山澤藏天地之奇贏方今
急治財百計謀金生何不條便宜官採輸額征嗚乎此厲階毒蠱
不可嬰地產有時盡國課恆取盈前朝礦稅禍糜爛如沸羹丁男
化亡命去弄潢池兵富國在本計錐刀非所營端人恥言利宏羊
竟當烹此語合洗耳勿令賢守驚雄奇深偉胸次可想見矣未

海陽縣志

卷三十四

列傳三

六

粵嘗成嶺遊集又所著有遂初堂集

據國朝別裁集
古瀛詩苑參修

張尚瑗字宏蘧號損持吳江人康熙戊辰進士官翰林院庶吉士
改江西興國縣知縣其客潮也與潘耒同時酬唱和歌挑燈走筆
或至三四疊韻與邑人陳珏友善嘗語人曰吾入粵於惠得葉西
邨適於潮得陳雙山珏不負此行矣詩品沈著宗法昌黎故尤工
古體論者謂其猶書家之顏平原柳誠懸也其謁韓文公廟云總
角誦公文不啻編三絕半世味公道無能劍一決維公不朽姿薄
雲貫虹蜺謗傷與誇銜兩者均蠓蟻氤氳一瓣香萬古應同蕪舉
舉何未生敢云景行切潮陽謫宦區偶然鴻爪雪藉此滌炎陬海
濱斗杓揭湖流漾清派峯勢環飛岵江山銜明德臨眺心神澈白

雲飄檐楹恍惚靈旗掣次章云史公識尊聖世家表弟子後雖未
敢例義在可竊比濟濟伊洛徒游楊復羅李韓門數入室若籍湜
服喜唐宋兩朝史附傳共編紀匹夫百世師坡言得之矣配禹尚
非誇傳軻又何訾荒荒海水南明珠孕天水過化遂成材廟食芳
蘋芷虬枝侍郎木檜柏同薿薿二詩長洲沈文愨嘗選入

國朝別裁集中張去官後一意研經箋疏甚富行世者有三傳折

諸詩則上鐫閩粵遊作全稿散失深可惋惜云

據張志國朝別裁集參修

蔡世遠字聞之號梁村漳浦人康熙己丑進士官少宗伯爲理學
名儒辛丑夏至澄海會宗人講明正學遊郡寓同年翁廷資家登

臨諸勝皆有題詠

據周志修

海陽縣志

卷三十四

列傳三

七

孟亮揆字端士號繹來長洲人康熙庚戌進士官翰林侍讀學士
乙卯客潮游覽讌集吟詠最多有過竹林寺訪宜白上人詩云雲
肩縹緲接重嵐燈火熒熒佛一龕已覺墨卿來研北況兼竹色似
江南摘蔬味美齋翻好落子聲遲弈正酣半日蕭閒塵慮息可容
借榻臥精藍所著有江嶺紀游集

據府周志古瀛詩苑參修

謹案舊志稱亮揆游潮寓西郊竹林寺今核詩題稱過訪且
玩結末二語意第擬議之詞非實事也

邱京字禹平號稼堂仁和人幕游潮州工詩有潮州竹枝詞云滄
溪渡口暮春天月色臨江收瘴煙聽澈蠻歌渾不解柳邊棹出蛋
家船十八女兒喚妹娘潮紗裁翦試輕裳儂心偏愛西施舌洗手

臨廚自作湯

據古瀛
詩苑修

劉璇字玉史漳浦人康熙中客潮後遂家焉能詩與邑人曾華蓋
善嘗贈其過訪云陋巷難容長者車高軒何意過茅廬救貧賴有
煙霞富忘世休嫌禮敬疏書擁百城懸一榻竹連千畝夾清渠謾
言野老陪冠蓋階下蒼松亦大夫紹漢字子瑩亦漳浦人少娶於
潮後竟不歸詩頗落落其有感云客夢不堪碎終宵恨若何文章
淪草莽鬼魅弄風波看劍懷難釋沖冠髮倍多蒼穹誰與訴歲月

漫蹉跎

同上

史瑗字翼之號慕劬溧陽人以知府許錫齡延爲子弟師來潮徧
游諸勝又在潮日有長春詩百首錄其存者三首春簾云曉日樓

海陽縣志

卷三十四

列傳三

八

頭雲漠漠暮山江上雨絲絲何如二月揚州路十里春風盡捲時
春淚云菱鏡臺前似水流桃花臉裏幾時休閒來撚斷香羅帶溼
透春衫不舉頭春思云閒拔金釵枕上敲幾迴腸斷更難拋雲藍
小袖偏知覺笑指春風荳蔻梢瑗後登雍正癸卯順天鄉榜官知

府

據張志古瀛
詩苑參修

潘靖字梅仙莆田人客潮鎮幕著有別花吟一帙蓋將歸莆時作
也同時會稽金虞廷亦客潮靖歸虞廷送以詩云天涯若個是知
音偶爾披圖見素心談笑功名推卜式飄零草檄老陳琳大都世
事消醕酒一半愁懷付苦吟同此欲歸歸未得五湖煙水夢中深

虞廷字颺言後登進士官翰林

據古瀛
詩苑修

黃釗號香鐵鎮平人嘉慶己卯舉京兆試充 國史館繕書將次
銓知縣辭就教職素能詩以天空雁一聲著名 京師有一聲翁
之目鄭邸欲延課其世子惠邸亦屬程春海侍郎聘爲記室皆辭
焉道光丁酉司鐸揭陽旋居郡城掌教韓山城南兩書院樂波羅
園之勝移家僦居其間所著有讀白華草堂詩三集賦鈔經餒史
响鐵盦叢室諸書

據陳作舟
序文修

補遺

顏崇衡號湘帆嘉應優貢生學問淵博能詩道光庚寅辛卯間客
潮寓城西隅號所居曰菊園荒庵古牖之下藥鑪經卷若退院老
頭陀與邑詩人呂玉璜善晨夕過從唱和無虛日番禺張維屏稱

海陽縣志

卷三十四

列傳三

九

其詩如日之曙麗而彌清如氣之秋高而益爽世以爲知言所著
有春海一航集駢體古文綠萍吟館詩鈔虹橋草廬詩鈔

據顏詩
敘呂小

伊題詞
參修

倪鴻號耘劬江西桂林人官粵東司馬工詩張南山黃香石其師
也在粵二十年嘗築園越秀山麓顏曰野水閒鷗館與朋舊嘯詠
其中光緒丁丑游潮有弔馬忠烈墓詩云一后零丁兩孤小歷五
庚申宋祚了劇憐賸水與殘山獨力猶爲趙家保當年壓境元軍
來摧鋒寨將營門開身經大小百餘戰鳳凰山築骷髏臺身作干
城護桑梓氣吞敵國忘生死斗大孤城守二年納降羞共黃虎子
巡檢黃虎子
爲元內應 大事去矣復何言破巢之下無卵存成仁詎肯讓柴

市盡節竟欲追崖門何慚華胄宗新息竭盡臣心一片赤燐光休
化太師青國運應傷天水碧衣冠藁葬金山中風號雨歎來鬼雄
無人好事墓門畔補種冬青樹一叢鴻所著有留痕草退遂齋詩
鈔桐陰清話等集行世

據退遂齋詩序
採訪冊參修

海陽縣志

卷三十四

列傳三

十